



天公有保庇

大里簡（宜蘭大里）的天公廟講欲翻厝尾頂的舊瓦，欠一台貨仔車載柴料恰枋模，阿爸伊較熱性，就招我去遐做工工，起起落落搬差不多五逝的工課，誠緊就煞矣。欲走的進前，廟公共一塊吊仔運轉台的平安符替我結予好勢，才恰阮相辭。

幹出去廟埕是下晡二點彼皎兜，我干焦穿內衫、短褲，窗仔門總共絞落來搨風，嘛是熱到叫毋敢。駛到倚海的大路，隨鼻著海風的鹹濕味，嘛看著青 ling-ling 的海水，車內即時有淡薄仔涼涼，人就加爽快濟矣。

沿路無啥車咧走，阿爸坐踎邊仔早都睏甲齁齁叫，是毋是舞了傷忝，連我嘛目睷皮愈來愈重，幾若遍，瞌落去閤金起來的時陣，心肝頭攏會掣一下，強欲起雞母皮，頭殼內不時都咧大聲喝講愛停落來路邊眯(bî)五分鐘，嘛有叮嚀家己袂使啄龜、毋通睏去.....雄雄閤金起來的時陣，目睷前有一枝電柱直透抹(tu)倚來，講是有較慢，彼時陣袂輸有人放劍光咧，目睷前爍一下，捎我的雙手共『han-too-luh』小可仔偏過去正月，拄拄好予車頭閃過，隨聽著後斗捋(khê)著電柱「碰」！一聲.....車身略仔敲去，險仔栽落去海跤。阿爸驚一下隨精神起來，我是差一絲仔就破膽去，趕緊踏擋仔歇落來路邊，心肝必嘆倘、清汗湫湫滴。

聽候回魂轉來，頭殼有較精光的時陣，趟(tiô)落來路邊巡輪胎，攏飽飽無破風，毋過倚尾溜的車算仔有卯一搭，外漆落足大片，這聲，若無駛去保養廠板金敢就會煞咧。順紕越頭，看遠遠彼枝差一點仔予我無命的電柱，伊恬恬踎佇遐，恰我烏仁對白仁，袂輸共我會失禮、坐(tshê)毋著的款勢。閤翻轉身距起去後斗巡紕去現場的家私頭，攏原在好好，無幌出去車外，嘛無損歹去。上佳哉的是人攏平安無代，有小可仔拍驚慄色爾。閤起行的時陣，阿爸講：「是車內的平安符咧保庇，咱才有這個福氣，後過著愛較捷去天公廟遐拜拜！」

作者：藍春瑞

☆詞彙學習☆

【翻】huan：整修房屋
【熱性】jiat-sing：熱心
【公工】kong-kang：義工
【彼皎兜】hit-kha-tau：左右、那個範圍
【雞母皮】ke-bú-phuê：雞皮疙瘩
【眯】bî：小睡
【捋著】khê-tiòh：擦撞
【清汗】tshìn-kuānn：冷汗、虛汗

【敲去】khi--khì：傾斜
【破風】phuà-hong：輪胎漏氣
【車算仔】tshia-pín-á：車斗的邊門
【卯】mauh：凹陷
【這聲】tsit-siann：這下子
【坐毋著】tshê-m-tiòh：認錯、道歉
【慄色】lik-sik：(臉上有)懼色
【捷去】tsiáp-khì：常去